

Atras l'onn

«Marellas» dal Radio Rumantsch sin disc cumpact, part 19

Far chalenders

Glina, stailas e sulegl èn ils facturs determinants per far chalenders. Dentant han er facturs istorics e politics ordinà e mintgant mess en dischurden il chalender. Aveva Sta. Maria l'onn 1800 il prim da mars eri a Müstair, la vischnanca vischina, già ils 12 da mars. Differents chalenders e differents sistems han ditg procurà per charplinas e grondas discussiuns. Cun l'astrolog per hobi Vitus Cathomen e cun l'istoricher Ivo Berther dat la Marella in sguard als facturs astronomic, istorics e culturals dals chalenders e dal far chalenders. (Emissiun dals 4 da mars 2007; redacziun: Guadench Dazzi).

Janus e las novas entschattas

L'uman ha il ferm giavisch da pudair cumenzar tut anc ina giada. Quai di Iso Camartin, ed el cuntinuescha: Mintga propiast che nus faschain è ina nov'entschatta – e nus savain nua ch'ils blers propiast van a finir... Ils vegls Romans avevan in Dieu per las novas entschattas,



in cun duas fatschas, in che saveva guardar enavos ed enavant. Janus! Janus ha dà il num al Januar, l'emprim mais da l'onn. Iso Camartin e tschintg scolaras ed in scolar da l'Engiadina che van a la Scola chantunala a Cuira raquantan da Janus. Ma els na restan betg fitgads en il temp dals Romans. Els tiran parallelas cun il temp dad oz. (Emissiun dals 2 da schaner 2005; redacziun: Maria Cadruvi).

Il virus da tschaiver

U ch'ins ha el, u ch'ins n'ha betg el. E sch'ins ha el – lura rumpa el or insacura. Quai di Dumeni Capeder. Tar el è il virus rut or cur ch'el aveva 45 onns. Sia «rolla» preferida è quella da la lavunza en il til uffizial da Lucerna. Petra Caviezel da Sent ha senti il virus da tschaiver già da matta. Ella sa legra mintg'onn da far en ina gruppa il costum da tschaiver e d'ir al bal maschà. E Christina Bundi da Riein ha emprendi da conuscher il tschaiver a Mustér. Quai saja stà sco in chametg. Actualmain lavura ella cunzunt per il tschaiver, sco presidenta da l'Uniu da tschaiver da Mustér. Ma cur ch'ella dettia giu quest uffizi – lura fettschia ella puspè endretg tschaiver. (Emissiun dals 22 da favrer 2004; redacziun: Maria Cadruvi).

Da stgir e da cler... passan las uras

E duas giadas l'onn schonglain nus cun



Il decurs da l'onn na segna betg be il ciclus da la natira, mabain er blers usits e rituals da l'uman.

FOTO: PD

ellas. Mettain la primavaira nossas uras enavant e l'atun enavos. Faschain uschia ch'igl è la damaun pli stgir e la saira pli cler. Tschintg personas raquantan tge ch'il temp da stad e tge che stgir e cler signifitgan per ellas: la magistra Yvonne Hofmann Tester, il pur Mario Dedual, la sportista Maria Andrea, l'urer Thomas Nay, ch'ha vivi blers onns en Svezia e turna adina puspè enavos, e l'inspectur Gion Caviezel ch'è stà 10 onns a Singapur e gauda uss en Svizra puspè las quatter stagiuns. (Emissiun dals 28 da mars 2004; redacziun: Maria Cadruvi).

Cur che tut sa dasda puspè

Igl era in di fraid l'entschatta mars che Maria Cadruvi ha dumandà la glieud sin via a Glion pertge ch'els s'allegrian da la primavaira. Perquai ch'ins possia puspè ir or sin il funs a mundar, ha ina dunna ditg. Auters han manegià perquai ch'ins possia far puspè lungas spassegiadas, admirar las flurs, giudair il sulegl e vesair co che tut sa dasda. Il resvegli da primavaira è però sulettain in da trais resvegli en la Marella. En il segund resvegli vai per il sa dasdar suenter ina narcosa ed il terz resvegli pertutga mintgin, mintga damaun danovamain: Il vegnir alert suenter la notg. (Emissiun dals 26 da mars 2006; redacziun: Maria Cadruvi).

Viva la vita!

Legendas da la creaziun e da vita nova
Per il mund cristian è Pasca ina gronda festa. La festa da la levada. Da vita nova raquantan però er pievels na cristians.

Lur mitus, lur legendas èn plain fantasia. Qua datti trinitads divinas e monsters, qua è il tschiel ina tenda, qua vegn la glisch or d'in grip e qua datti curriers tranter tschiel e terra. La Marella porta 12 legendas curtas d'auters pievels: Dals Summers per exempel, dals Indians, Africans, Finlandais e Giapunais. L'actura Ursina Lardi che viva a Berlin legia las legendas da la creaziun e da vita nova. (Emissiun dals 11 d'avrigl 2004).

In battaisem giu sper il Rain

Quai è ina da las pussaivladads che singuls geniturs tschernan magari oz per laschar battegiar lur uffants – d'ina «impressaria spirituala» per exempel. Auters geniturs na laschan ozendi insumma betg battegiar lur figls e figlias. Il motiv: Els sa sentan pauc attaschads a la baselgia u vulan che lur uffants sa decidian sezs pli tard, schebain els vulan il battaisem u betg. Ma las personas da la baselgia catolica e reformada battegian sche pussaivel anc adina en baselgia. Per ellas n'è il battaisem betg mo in ritual privat, mabain er ina festa da la cuminanza. En la Marella vegnan tuts a pled. (Emissiun dals 30 da mars 2003; redacziun: Maria Cadruvi).

Nozzas en pajais esters

Las atgnas nozzas, ma er nozzas da figls e figlias ubain da parents ed amis tutgan tar las festas las pli marcantas en la vita. Ed ils usits da nozzas sin l'entir mund èn nundumbraivels. Angela Lardi raquinta da las nozzas da ses figl en Malaisia. In dals muments ils pli emozionals per ella è stà cur che ses figl ha lavà ils pes ad ella, ina part dal ritual da nozzas hindu. Flurina Derungs raquinta da las nozzas d'ina collega africana en Tansania nua ch'i dat anc il pretsch da spusa. E Valerian e Maria José Poltera raquantan da lur atgnas nozzas en il sid da la Spagna avant prest ortg onns. (Emissiun dals 18 da matg 2008; redacziun: Maria Cadruvi).

La glisch e la religiu

Ils dis èn curts, las notgs stgiras e nus festivain Nadal, la festa da la glisch. En tut las religiuns enconuschentas inscuntrain nus la glisch sco element central: la glisch sco appariziun concreta, en furma da chandailas, fieus e glischinas sontgas; la glisch sco sumeglia per l'amur, la speranza e la buntad; e la glisch sco medium da contact cun l'auter mund, sco agid da meditaziun, sco model d'enconuschientscha. Pertge questa fascinaziun da la glisch? Tge è sia pussanza, tge si'istorgia? (Emissiun dals 23 da december 2002; redacziun: Guadench Dazzi).

Anghels ed anghels, entiras armadas celestias

Passa 2000 onns suenter la naschient-

tscha da l'uffant Jesus datti sin terra entiras invasiuns dad anghels. Anghels per differents gusts e per pliras situaziuns. Ils anghels èn actuals pli che insacura, forsà perquai ch'i fa bain en quests temps malsegirs da crair ch'i dettia anghels. Linard Bardill ch'ha studegià teologia raquinta da l'ierarchia dals anghels. Simona, Jessica e Flavia Giger da Ruschein èn soras ed han mintgina ina pitschna collecziun dad anghels ch'ellas preschentan. Ed Angelo Tscharner, Angela Lardi e Stefan Engler han nums che fan endament anghels. Ed els crain er en anghels. Il cusseglier guvernativ ha schizunt in pitschen anghel da taila en ses biro – durant l'entir onn. (Emissiun dals 19 da december 2004; redacziun: Maria Cadruvi).

«Memento mori»

«Memento mori» u «ta regorda da la mort» ha in servient scutinà en l'ureglia da l'imperatur roman durant ses cortegi da victoria tras Roma. Er la Marella sa regorda da la mort. Durant in viadi per lung da l'istorgia da la mort preschentan nus litteratura e musica stgaffida en la confruntaziun cun la mort. Dal poem epic da Gilgamesh sur texts biblics fin tar musica contemporanea scuvrin nus stgagis da 5000 onns istorgia da mort occidentala. (Emissiun dals 24 da mars 2002; redacziun: Chatriina Gaudenz).

«L'ultima chamischa n'ha naginas giaglioffas»

La mort tutga tar la vita sco la naschientscha e tuttina è ella anc adina in tema da tabu. Mintgin studegia insacura londervi e mintgin ha er gia inscuntrà la mort. Ma nagin na vul dar atenziun ad ella, perquai ch'ella fa per part tema ed è nunenconuscenta. La Marella accompagna il viadi da l'ultim vestgi ch'ina persona porta durant ses ultim viadi: la davosa chamischa. (Emissiun dals 2 da november 2014; redacziun: Anna Caprez).

Ti es tschendra e turnas ad esser tschendra

Cun quests plects vegnan ils cartents regurdads mesemna da la tschendra che lur structura terestra sa mida. La mida en tschendra la pli evidenta è la cremaziun. Oz èsi uschia en Svizra ch'ina gronda part dals morts vegnan cremads. Quai che resta enavos è circa dus kilos tschendra. La dumonda è: Tge far cun questa tschendra? Sutterrar è ina pussaivladad. Ma i dat ozendi anc autras che vegnan pratigadas. Ina mamma raquinta pertge ch'ella ha per il mument en stiva la tschendra da sia figlia ch'è sa disgraziada en in accident da traffic. Ed in dals schefs da la firma «Algordanza» preschenta l'offerta da far or da la tschendra umana in diamant. (Emissiun

dals 26 da favrer 2006; redacziun: Maria Cadruvi).

La cultura en noss santeris

Tut sa mida, er las fatschas da noss santeris. In crap-fossa è per ils relaschads en blers cas in punct impurtant da regurdientscha – er sche blera glieud na giavisch nagin monument pli. Tge èn las consequenzas per ils relaschads sche la tschendra dals perdavants è dapertut e nagliur? In auter extrem èn fossas persunalizadas cun anghels, lieurs, rodas da vent ed uschia vinavant. Craps-fossa industrials or da granit d'Andeer. Ins pudess prest dir: ils santeris vivan. In svilup che plascha – u betg. (Emissiun dals 29 d'avust 2010; redacziun: Andrin Willi).

Abecedari da Nadal

Dad A sco aur ed argent, sur B sco bambin resp. anghelin da Nadal fin T sco tschupè d'advent tanscha noss abecedari da Nadal. Blers na san forsà betg pertge che nus mettain cullas sin il pignol da Nadal, daco che nus faschain regals, daco ch'ils Trais Sontgs Retgs èn suandads la staila da Betlehem e dapi cura ch'i dat il chalender d'advent. La Marella è ida a la tschertga da las respostas. (Emissiun dals 23 da december 2001; redacziun: Daniela Cavelti).

Bambin & co.

Il temp d'advent e Nadal han Son Niclè e bambin bler da far: leger brevs plain giavischs e purtar regals, e quai sche pussaivel tut dascus. La Marella è sa messa sin ils fastizs da bambin & co. per scuvrir lur secrets da lavurar. La Marella discuta er cun experts davart la tactica dal bambin e da Son Niclè. E tgi che na crai betg en il bambin & co. vegn surprais! (Emissiun dals 25 da december 2011; redacziun: Pia Plaz).

Intschains, mirra ed autras raschas

«Alura han els scuvri lur stgagis e preschenta ad el regals: aur, intschains e mirra», scriva Matteus en ses Evangeli. Da l'aur è adina puspè vegni discurre. Ma ils auters dus duns èn plitost vegnids tractads da madrigna en il decurs dals tschientaners. La Marella va en la sacristia da la catedrala a dumandar sur Giuseppe Quinter pertge ch'els sabis hajan purtà sper il metal prezios duas raschas al novnaschi. Ella va tar l'apotecra Seraina Buchli per intervegnir en tge medicaments ch'ins chattia intschains e mirra. Ella porta in discurs cun l'anteriu selvicultur Nicolin Bischoff sur da raschas en general. Ed ella va a cumprar intschains tar Ramun Berther en in negozi da devozionalias. (Emissiun dals 7 da schaner 2001; redacziun: Maria Cadruvi).

Nadal e Bumaun: Stailas, banchets, regurdanzas e charplinas

Nadal e Bumaun èn colliads cun tuns, odurs, gusts ed atmosferas ch'ans accompognan dapi noss'uffanza. Il ritmus da quests dis è determinà da disas e tradiziuns. Tge muntada han las Festas oz per nus e pertge sa maschaidan bleras giadas il plaschair cun il starmamento? Il psicolog Gioni Defuns, l'astrologa Andrea Kónz ed il criticher da gastrologia Andrin Willi discutan davart gusts e frusts, las stailas ed il mangiar. (Emissiun dals 28 da december 2003; redacziun: Guadench Dazzi).

La presentaziun:

«Marellas» dal Radio Rumantsch: Contribuziuns emessas ils onns 2001–2015, accessiblas en la Biblioteca chantunala sin disc cumpact.

Dapli infurmaziuns:

chatta.ch/?hiid=4734
www.chattà.ch



Il temp da Nadal è collià sco nagin auter cun tradiziuns da tuttas sorts.

FOTO: PD